




宋黃文節公文集卷第六

七言古

精江引

嘉祐六年時
公年十七

江鷗搖蕩荻花秋八十漁翁百不憂
清曉采蓮來盪槳夕陽收網更橫舟
群兒學漁亦不惡老妻白頭從此樂
全家醉著篷底眠舟在寒沙夜潮落

趙伯山中外舊事云先生少有詩名未入館時在
葉縣大名德州德平詩已卓絕後以史事待罪陳
留偶自編退聽堂詩初無意盡去少作胡直孺少
汲建炎初帥洪州首為先生類詩文為豫章集命
洛陽朱敦儒山房李彤編集而洪炎王父專其事
遂以退聽堂為斷以前好詩皆不收殊謬誤也按

錄此俾海內有
識者共曉云

還家呈伯氏

熙寧四年葉
縣還家作

去日櫻桃初破花歸來着子如紅豆四時驅迫少須
臾兩鬢飄零成老醜永懷往在江南日原上急難風
雨後私田苦薄王稅多諸弟號寒諸妹瘦扶將白髮
渡江來吾二人如左右手苟從祿仕我還回且慰家
貧兄孝友強趨手板汝陽城更責愆期被訶詬法官
毒螫草自搖丞相霜威人避走賤貧孤遠益如此此
事端於我何有一囊粟麥七千錢五人兄弟二十口

宦如元亮且折腰心似次山羞曲肘北窓書冊久不
開筐篋黃塵生鑱鋌何當畧得共討論况廼雍容把
杯酒意氣敷腴貴壯年不蚤計之且衰朽安得短船
萬里隨江風養魚去作陶朱公班衣奉親伯與儂四
方上下相依從用舍由人不由己廼是伏轅駒憤耳

流民歎

葉縣作

朔方頻年無好雨五種不入虛春秋邇來后土中夜
震有似巨鼇復戴三山遊傾墻摧棟壓老弱冤聲未
定隨洪流地文剗剗水飢沸十戶八九生魚頭稍聞

澶淵渡河日數萬河北不知虛幾州累累襁負裹葉
間問舍無所耕無牛初來猶自得曠土嗟爾後至將
何怙刺史守令真分憂明詔哀痛如父母廟堂已用
伊呂徒何時眼前見安堵踈遠之謀未易陳市上三
言或成虎禍災流行固無時堯湯水旱人不知桓侯
之疾初無證扁鵲入秦始治病投膠盈掬俟河清一
簞豈能續民命雖然猶願及此春略講周公十二政
風生羣口方出奇老生常談幸聽之

次韻答張沙河

元豐二年北京作沙河縣
乃河北西路去北京不遠

張侯堂堂身八尺老大無機如漢陰猛摩虎牙取吞
噬自歎日月不照臨策名日已汙軒冕逃去未必焚
山林我評君才甚高妙孤竹截管空桑琴四十未曾
成老翁紫髯垂頤鬱森森眉宇之間見風雅藍田烟
霧生球琳胸中礪磊政須酒東海可攬北斗斟古人
已悲銅雀上不聞向時清吹音百年毀譽付誰定取
醉自可結舌瘖使公繫腰印如斗駟馬高蓋驅駸駸
親朋改觀婢僕敬成都男子寧異今又言屋底甚縣
罄兒婚女嫁取千金古來聖賢多不飽誰能獨無父

母心衆鷁墮地各有命強爲百草憂春霖艾封人子
暗目睫與王同床悔沾襟隴鳥入籠左右啄終日思
歸碧山岑一生能幾開口笑何忍更遣百慮侵忽投
雄篇寫逸興仰占乾文動奎參自陳使酒常罵坐惜
予不與朋合簪君材蜀錦三千丈要在刀尺成衣衾
南朝例有風流癖楚地俗多詞賦淫屈原離騷豈不
好只今漂骨滄江潯政令夷甫開三窟獵以我道皆
成禽溫恭忠厚神所勞於魚得計豈厭深丈夫身在
要勉力豈有吾子終陸沉鄙人相士益多矣勿作蔡

澤笑噤吟

古風次韻答初和甫二首

元豐甲子德平鎮作
公生乙酉至是年四

十和甫名虞世名士善
醫有養生必用方行世

饑思河鯉與河魴渴思蔗漿玉盃涼冬願純綿對陰
雪夏願絢絺度盛陽萬端作計身愁苦一事不諧鬢
蒼浪調笑天街吟海燕藜羹脫粟非公狂

其二

君吟春風花草香我愛春夜璧月涼美人美人隔湘
水其雨其雨怨朝陽蘭荃盈懷報瓊玖冠纓自潔非

滄浪道人四十心如水平那得夢為蝴蝶狂

次韻答和甫盧泉水三首

并序

和甫作盧泉之水不求於古樂府而規摹暗合予
為和成三疊自予官河外罕得逆耳之言於朋友
和甫愛我也居有藥言吾不欲其思盧泉也故作
其一父母之邦有如仲尼柳下惠而懷安之以吾
之樂雙井知和甫之不忘盧泉也故作其二坐進
此道者於物無擇清漳之波濁河之流盧泉之水
求其異味而不得也親樂之身安之斯可矣故作

其三夫三言者雖不同唯知言者領其不異也

初侯不能六尺長少日結交皆老蒼勢利不可更炎
涼解纓從我濯滄浪與君論心松柏香何為獨憶盧
泉之上多綠楊盧泉如練照秋陽泉上之人猶謗傷
此邦雖陋有佳士勿厭風沙吹茫茫願君不負上池
水囊中探丸起人死

其二

盧泉之木百尺長下蔭泉色如木蒼蘋風荷雨洒面
涼倒影搖蕩天滄浪網登錦鱗蒲荇香何以貫之柳

與楊古來希價入咸陽貪功害能相中傷君今已出
紛爭外但思煙波春淼茫奉親安樂一杯水盧泉之
濱可忘死

其三

舍後鐘梵爐烟長舍前簾影竹蒼蒼事親煥席扇枕
涼中有一士鬢蒼浪同心之言蘭麝香與游者誰似
姓楊朝發枉渚夕辰陽懷瑾握瑜祇自傷東有濁河
西清漳胡為搔頭盧泉思茫茫清明在躬不在水此
曹狡獪可心死

贈趙言

元豐三年
北京作

饒陽趙方士眼如九秋鷹學書不成不學劍心術妙
解通神明鑒如俯身拾地芥相如仰面觀天星自言
方術雜鬼恠萬種一貫皆天成大梁卜肆傾賓客二
十餘年聲籍籍得錢滿屋不經營散與世人還寄食
北門塵土滿衣襟廣文直舍官槐陰白雲勸酒終日
醉紅燭圍棋清夜深大車駟馬不回首強項老翁來
見尋向人忠信去表襮可喜政在無機心輕談禍福
邀重糈所在多於竹蒨林翁言此輩無足聽見葉知

根論才性飛騰九天沉九泉自種自收皆在行先期
出語駭傳聞事至十九中時病輪困離奇惜老大成
器本可千萬來自嘆輕霜白髮新又去驚動都城人
都城達官老於事嫌翁出言不斌媚有手莫炙權門
火有口莫辨荆山玉吳宮火起燕焚巢當時卞和斲
兩足千里辭家却入門三春榮木會歸根我有江南
黃篋舫與翁長入白鷗群

次韻晁補之廖正一贈答詩

元豐二年北京作
公再答明畧詩云

使年七十今中半蓋公是年三十
有五也補之字無咎正一字明畧

晁子抱材耕谷口世有高賢踐台斗頃隨計吏西入
關關夫數日傳車還封侯半屬妄校尉射虎猛將猶
行間無因自致青雲上浪說諸公見嗟賞驥伏鹽車
不稱情輕裘肥馬鳳凰城歸來作詩謝同列句與桃
李爭春榮十年山林廖居士今隨詔書稱舉子文章
宏麗學西京新有詩聲似侯喜君不見古來良為知
音難絕絃不為時人彈已喜瓊枝在我側更恨桂樹
無由攀千里風期初不隔獨憐形迹滯河山

再次韻呈廖明略

吾觀三江五湖口湯湯誰能議升斗物誠有之士則
然晚得廖子喜往還學如雲夢吞八九文如壯士開
黃閭十年呻吟江湖上青楓白鷗付心賞未減北郭
漢先生五府交書不到城

漢汝南
廖扶

相者舉肥驥空老

山中無人桂自榮君既不能如鍾世美匭函上書動
天子且向華陰郡下作參軍要令公怒令公喜君不
見晁家樂府可管絃惜無傾城為一彈從軍補掾百
僚底九關虎豹何由攀男兒身健事未定且莫著書

藏名山

走答明略適堯民來相約奉謁故篇末及之

君不見生不願為牛後寧為雞口吾聞向來得道人
終古不忒如維斗希價咸陽諸少年可推令往挽令
還俗學風波能自拔我識廖侯眉宇間省庭無人與
爭長主司得之如受賞東家一笑市盡傾略無下蔡
與陽城生珠之水砂礫潤生玉之山草木榮觀君詞
章亦如此諒知躬行有君子更約探囊閱舊文蛛絲
燈花助我喜賢樂堂前竹影班好鳥自語莫令彈北
鄰著作相勞苦整駕謁予邀同攀應煩下榻煮茶藥